

समा. 09.20 Hrs

1. मुख्यमंत्री उमर अब्दुल्ला होंरें पुंछ च समीक्षा बैठक दे दरान शिक्षा सहायता योजनाएं तैहत डेढ़ करोड़ रुपें दी रकम जारी कीती।
2. केन्द्री मंत्री डाक्टर जीतेन्द्र सिंह होंरें मिशन “मौसम” तैहत हासल प्रगति दा जायजा लैता ते भारती मौसम विभाग गी निर्देश दिते जे ओह सरबन्धत उपकरणें गी स्थापित करने च तेजी आहनन।
3. 44में भारती अंतराष्ट्री बपार मेले च जम्मू-कश्मीर दा पंडाल कामयाबी कन्नै सम्पन्न-13 करोड़ 50 लख रुपें दी कीती बिक्री।
4. जम्मू-कश्मीर नै पूरे प्रदेश च बिजली दे 3 लख 81 हजार स्मार्ट मीटर लाइयै- इस दिशा च 40 प्रतिशत प्रगति हासल करी लैती ऐ।
5. महिलायें दी नेत्रहीन क्रिकेट टीम आसेया टी-20 विश्व कप जितने दी बड़ी मानै आली उपलब्धि दे मगरा कठुआ दियें अनेखा देवी ते उंदी टीम गी प्रधानमंत्री हूंदे आसेया सम्मानत कीता गया ऐ।

मुख्यमंत्री उमर अब्दुल्ला होंरें बन्ने आले जिले-पुंछ च लाई गेदी इक जायजा बैठक दे दरान शिक्षा सहायता योजनाएं तैहत डेढ़ करोड़ रुपें दी रकम जारी कीती। इस मौके पर बैठक गी सम्बोधित करदे होई मुख्यमंत्री होंरें जोर देइयें आखेया जे उंदी सरकार शैक्षणिक सुविधाएं च सुधार आहनने- सार्वजनिक ढांचे गी तगड़ा बनाने ते खिते दे आर्थिक विकास गी बढ़ावा देने बक्खी चेचा ध्यान देआ करदी ऐ। उनें आखेया जे एह सारी गेंह पैहलकदमियां- इक बरोबर ते सामे विकास गी जकीनी बनाने ते लोकें दे जीन जीने दे मय्यार गी बेहतर बनाने आस्तै अत लाज़मी न। उनें अधिकारियें गी निर्देश दिते जे ओह बक्ख-बक्ख मैहकमें बशकार तालमेल जकीनी बनावे होई कम्में च हासल प्रगति दी लगातार निगरानी करन ते सब्भनें स्तरें पर जोआबदेही जकीनी बनान।

MoS Mission Mausam

केन्द्रीय मंत्री डाक्टर जितेन्द्र सिंह होरें कल भारतीय मौसम विभाग च इक जायजा बैठक दी अध्यक्षता कीती जेहदे च भारत दे मौसम दी भविष्यवाणी ते जलवायु निगरानी प्रणाली गी बधाने दे मकसद कन्नै कीती गेदी पैहलकदमी 'मिशन मौसम' दी प्रगति दा जायजा लैता गेआ। डाक्टर सिंह होरें मौसम विभाग दे अधिकारिणं गी निर्देश दिता जे ओह खरीद ते स्थापना दी प्रक्रिया च तेजी आनन। इस पैहलकदमी दा मकसद शुरुआती चेतावनी प्रणाली ते आपदा सरबन्धी तैयारियें च सुधार करना ऐ। मंत्री होरें भरोसा जताया जे किट्ठे रलियै कीते जा'रदे जतने कन्नै इस गल्लै गी यकीनी बनाया जाई सकदा ऐ जे लक्ष्य तैय समें शा पैहले हासल करी लैते जाई सकन।

<><><><><><>

JKTPO (Byte)

44में भारतीय अंतराष्ट्रीय बपार मेला (IITE)-2025 च जम्मू-कश्मीर दा पंडाल कामयाबी कन्नै सम्पन्न होआ। मेले च जम्मू-कश्मीर दे पंडाल नै 13 करोड़ 50 लख रुपे दी बिक्री कीती ते इसी 6 जहार शा मते संगठनें ते व्यक्तिगत कारोबारियें कोलां बपार आस्तै दिलचस्पी दिक्खने गी लब्बी। इस पंडाल च जम्मू-कश्मीर दे मशहूर दस्तकारी- हथकड़ी ते राई-बाई उत्पादे गी प्रदर्शित कीता गया- जिन्हें घरेलू ते अंतराष्ट्रीय खरीददारें गी बड़ा मता आकर्षित कीता। इस दौरान सीनियर अधिकारियें संस्कृति ते बपार गी रलाइयै कीते गेदे सैहकारी जतनें दी सराहना कीती। भविष्य गी दिक्खदे होई जम्मू-कश्मीर दे बपार गी बधाने सरबन्धी संगठन जम्मू-कश्मीर ट्रेड प्रमोशन ऑर्गेनाइजेशन (JKTPO) नै IITF-2026 च हिस्सेदारी गी होर बधाने - बजार तगर पुज्ज बधाने ते इक प्रमुख आपूर्ति आहले गंतव्य दे रुपै च जम्मू-कश्मीर दी स्थिति गी होर मजबूत करने आस्तै नमें उत्पाद पेश करने दी योजना बनाई ऐ। इस मौके पर बोलदे होई किश विक्रेताएं अपने विचार सांझे करदे होई आखेया

<><><><><><>

CS Youth

मुख्य सचिव अटल डुल्लु होरें केन्द्र शासित प्रदेश दे नौजवानें लेई इक व्यापक ते बड़ी कौशल कार्य-योजना तयार करने आस्तै कल इक उच्ची सतह दी बैठक दी प्रधानता कीती। राष्ट्रीय शिक्षा नीति कन्नै मेल खंदे इक तगड़े कौशल विकास तंत्र दी जरूरतें पर जोर दिंदे होई-उनें भविष्य लेई तयार पेशवरें गी आकार देने च स्कूल-कालजें ते युनिवर्सिटियें दी भूमिकाएं पर लौ पाई। मुख्य सचिव होरें कम्म-रोजगार दे सार्थक मौके जकीनी बनाने लेई नौजवानें गी ऐसे कौशल कन्नै लैस बनाने दी जरूरतें पर जोर पाया ऐ- जेहड़े अगगे चलियै कम्म-रोजगार दे तगड़े मौके हासल करने च मददगार बनन। इस मौके पर अधिकारियें ते होरनें सरबन्धत धड़ें- जम्मू-कश्मीर दे नौजवानें गी उद्योगें कन्नै जुड़े दे हुनरें कन्नै लैस करने ते आर्थिक ते तकनीकी मंगें पर खरा उतरने आले हुनरमंद कार्यबल गी तयार करने जनेह विशें पर चर्चा कीती।



JKBOSE Comp

जम्मू-कश्मीर दे स्कूली शिक्षा बोर्ड आसेया जागतें दे गांधीनगर आले सरकारी हायर सैकैन्ड्री स्कूल च अदाकारी- लोक गीत ते नाच आले केन्द्र शासत प्रदेश स्तर दे राष्ट्री मुकाबलें दे पैहले चरण दी मेज़बानी कीती गई। एन.सी.इ.आर.टी दे राष्ट्री जनसंख्या शिक्षा प्रोग्राम दे तैहत करोआए गेदे इस कार्यक्रमें दा मकसद किशोर उम्री दे बच्चें दे अंदर उंदी सेहत- निजी सुरक्षा- डिजिटल साक्षरता- नशीले पदार्थें दे माड़े नतीजें ते पर्यावरण दी राक्खी-हिफाजत बारे जागरूकता पैदा करना हा। जम्मू खिते दे सब्भन 10एं जिलें थमां टीमें अपनी प्रस्तुतियें दे राहें 250 शा मते दर्शकें थमां बड़ी मती सराहना हासल कीती। इस कार्यक्रम दा उदघाटन जम्मू-कश्मीर स्कूली शिक्षा बोर्ड दे सचिव गुलाम हसन शेख होरें कीती। इस मौके किट्ठ अगगे भाशण दिंदे होई उनें आखेया



JK Power Progress

जम्मू-कश्मीर नै नमें सिरेया त्यार बिजली दी बंड सरबन्धी सैक्टर आली योजना तैहत पूरे प्रदेश च 3 लक्ख 81 जहार शा मते स्मार्ट मीटर लांदे होई इस दिशा च 40 प्रतिशत प्रगति हासल करी लैती ऐ। नवम्बर -2020 च रम्भी गेदी इस परियोजना दे तैहत 2026 तगर 9 लक्ख 50 जहार स्मार्ट मीटर लाने दा लक्ष्य मित्थेया गेदा ऐ। बिजली विकास विभाग आसेया जारी एकडे सुधारें दा मकसद- दक्षता च होर सुधार आहनना- बिजली ढांचे गी तगड़ा बनाना ते बिजली सरबन्धी नुक्सानें गी घट्ट करना ऐ। ध्यानजोग ऐ जे जम्मू खिते च अजें तोड़ी इक लक्ख 87 जहार जिसलै के कश्मीर च इक लक्ख 93 जहार स्मार्ट मीटर लाई दिते गेदे न।



Anekha Blind Cricket (Bytes-2)

इक गौरवपूर्ण मौके पर-नेत्रहीन लैई महिला टी-20 विश्व कप क्रिकेट 2025 च अपने शानदार प्रदर्शन कन्नै इतिहास रचने आहली भारतीय टीम दी सदस्य ते जम्मू-कश्मीर दे कठुआ जिले दे मछेड्डी गां दियां अनेखा देवी होर अपनी टीम दे बाकी मिम्बरें कन्नै प्रधानमंत्री नरेन्द्र मोदी हुंदे कन्नै मलाटी करने आहलें च शामिल हियां। भारतीय टीम नै हाल च गै श्रीलंका दे कोलम्बो च खेड्डे गेदे फाईनल च नेपाल गी रहाइयै विश्व कप खिताब जितेया हा। मलाटी दौरान टीम नै प्रधानमंत्री होरें गी अपने हस्ताक्षरें आहला बैट भेंट कीता ते अपने प्रेरणादायक तुजुर्बे सांझे कीते। प्रधानमंत्री मोदी होरें उंदे

जज्बें ते दृढ़ निश्चय दी सराहना करदे होई उंदी इस उपलब्धि गी राष्ट्र आस्तै सच्ची प्रेरणा करार दिता। टीम दी जित दे लम्हें गी सांझा करदे होई अनेखा नै आखेया

तौंआई खुशी ते गर्व कन्नै भरोचे दे उंदे परोआर दे सदस्यें आखेया

<><><><><><>

Read by : **Kunal Shrivatsa and Vijay Bajaj**
D.E.O : **Rajni Devi**
Skilled : **Rajat Paul**
Editor : **Abhilasha Sharma**